


洋学文庫
文庫 8
D 283
8





中西紀事卷之二十四上

江上蹇叟

海疆殉難記上

是編紀殉難之臣不論文武不敘官階悉以死事年月之先後爲次其兵勇紳民婦女之死難者附著於後仿敘錄之例兼備紀事之體俾後之蒐入史志者得以攷見其本末

定海殉難道光二十年六月

浙江定海縣知縣姚懷祥

浙江定海縣典史全福

大令號履堂福建侯官縣人嘉慶戊寅舉人道光乙未大挑一等分發浙江補定海縣以庚子五月蒞任踰月而難作方洋船之游

39- 7731

010190620056



奕於舟山也初以為賈船不設備繼見向北行駛之船大小二十
六號輪烟蔽天總兵方整兵出洋突有火輪船二直抵道頭街探
量水勢大令偕游擊羅建功登舟詰其來意言語不通懷中出漢
字照會文書一角脅大令獻城據浙省探報稱文書內統兵之將一係英
水師子爵伯麥一係統領陸路兵官布爾
利其文內稱啓定海縣主速將所屬海島堡臺
一切投獻惟候半個時辰即行開礮轟擊等語大令不答退謀於鎮將請
即於道頭街扼要為守城計總兵張朝發曰城非吾責吾領水師
知扼海口而已若縱之登岸大事去矣大令乃與少尉謀令赴村
壘招募鄉勇而身率城守兵登陴塞四門以土袋示無出意六月
初七日總兵被礮轟擊受傷落水弁兵昇之登岸送至鎮海羅建
功等託以城門重閉亦先後走大令見事急坐南城上招鄉民登
城守无應者少尉所募之鄉勇甫至城聞變亦潰是日四更西兵
梯城而入大令奔赴北門外普慈寺前投池中死少尉執刀守獄
門寇至脅之降不屈遇害

吳興人有為大令作傳者謝貳尹蘭生刊入思忠錄

謝官於浙庚子
辛丑間隨大營

幫辦軍務多得之目擊
者撰有思忠錄刊行

其略云君先世籍江寧之上元嘗與同僚問蔣

侯青骨為神事敬歎不已歷署象山龍游嶧縣二十年定海安吉
二邑缺君以次當得安吉大府念定海重地宜諳練吏以屬君五
月之任邑有雪交亭明華亭張太傅殉節所君至修葺之詩以志
慨六月初三日課書院為臣不易題越日英人犯定海君及總兵
張朝發飛請寧波提督乞援兵不至總兵中傷回鎮君度力孤不
能守以印交僕送郡中及城陷赴城北同歸城為明魯王諸臣叢
葬處下有梵宮池投池死之典吏全福同殉節事聞奉

旨賜卹舟山及杭城之吳山皆建祠祀之

湯世瑄殉難紀事詩序云全君福字疇五甘肅吏員爲人剛直幹事明決逆回張格爾謀叛曾在軍營當差揚威將軍長相國陝甘制府楊官保以軍功咨給六品頂戴儘先選授定海典史庚子六月城陷持刀立獄門有勸之去者曰吾職在此安敢逃及敵至大罵不屈遂被戕

按烏撫定海失守奏內稱初八日英人陷定海知縣姚懷祥典史全福不屈投水被害身死蓋投水指大令被害指少尉未分析也又附片奏稱定海知縣姚懷祥典史全福一并死節均屬可嘉容臣查其家屬下落另行照例請卹等因後吏部議照陣亡例給雲騎尉世職以次給恩騎尉世職罔替禮部議照六品官例給全葬銀一百兩致祭銀八兩入祀本籍府城昭忠祠據此則亦循例之卹典耳洋氛三載擾及四省遙遙三千餘里其守土知縣之殉難者惟大令一人而不能得從優之卹典則浙撫之奏報未能詳核也

江甯侯丈青甫爲子言其妻姪王某在定海爲徵比小席值是年六月之役其家人聞變相聚而哭不復意其生還也踰月王踉蹌歸述大令殉難之前二日集幕中刑鏡以下語之曰守土之義不可以不死君等敵至則去亟早圖之乃按諸幕友束修一分致相與揮淚而別是日一晝夜間署中上下星散某以小席隨身一童僕定海人先期走避獨力屏當天明始出行七里而礮聲作矣觀此知大令非徒惓惓於友誼亦見其造次顛沛間從容不苟

也

又按明之同歸城在補陀茶山上其下梵宮祠即成仁祠故址也雪交亭者華亭張太傅肯堂之邸第太傅守翁洲築雪交亭於邸中夾以一梅一梨花開則兩頭相接語蘇兆人安應元曰此吾止水也厥後大兵破翁洲至公邸雪交亭下見遺骸二十有七則公及其四姬一子婦一女孫諸僕婦暨參軍事之儀部蘇兆人等大兵驚愕卻步歎息命局其門時公之故將都督汝應元已披緇爲補陀僧赴帥營請葬得許而倉卒間無所得棺乃火化之藏以三大甕瘞之於補陀之茶山應元築寶稱菴奉公祀終其身一時相繼殉難者則吳稚山尙書鍾巒以下二十餘人更有監國妃嬪及大臣文武眷屬之在城中者又數十人皆葬於山上故名曰同

歸城其下爲成仁祠祀殉難諸臣即大令投水處也大令當城陷出北門過成仁祠曰此昔人殉難之所吾何憾焉遂投普慈寺中死予謂太傅以雪交亭爲止水死志已決今大令到任即首葺之不踰月而難作則是亭者又大令止水之先識也海外彈丸之地纍然爲古戰場越二百年洋氛再至劫運重逢前有守土之二臣後有折衝之三帥舟山片壤浩氣鍾焉與弔湘哀郢同千古矣鎮守定海舟山等處總兵張朝發

總兵福建人據烏撫參奏內稱張朝發咨稱該鎮於初七日自卯至午在船與西兵互相轟擊被傷左腿甚重落水扶板登岸不得已帶傷入城而臣等提訊羅建功等據稱洋船入港以後會同文武商酌接仗僉謂敵船恃其礮火止利於水不利於陸擬將水陸

各軍一半撤至離城一里之半路亭扼要地方堵住一半撤至城中防守衆謀皆同旋向該鎮剴切稟明卽該縣姚懷祥及各紳士等亦皆求請該鎮進城督率保護乃該鎮傳調防城各營兵弁在於港面迎擊致被敵礮轟斃官兵無數迨至該鎮帶傷進城該游擊等同至城濠姚懷祥已將四門緊閉不能懸城而上敵人徹夜攻城將東門攻破紛紛而入該官旣失其所該游擊等法無所施遂冒死到鎮等因臣等查該總兵張朝發當敵船突入定海羅建功等擬請分兵或戰或守衆謀僉同收合尙有一千餘兵可以堅守何至猝然城陷乃該鎮張朝發愎諫撤守以致喪師失城情罪實屬重大等因奉

旨革職拏問在案又七月初七日奏稱已革總兵張朝發經臣等正

在飭遵將看守之張朝發等收禁間卽據寧波府鄞縣知縣舒恭受以該革總兵自被礮傷後日漸沈重飲食不進醫治無效於七月初五日戌刻身故經該縣會同城守都司李宗白親往查看該革總兵實係火毒內攻身死等情詳報前來臣等伏查張朝發雖因傷重殞命現奉

飭部定罪其尸棺應仍飭看守同羈禁之羅建功等一併恭候

諭旨遵行因等據此則總兵中創殞命核以當日受傷落水搶救回鎮其非有意脫逃藉傷諉卸可知也至謂其愎諫撤守據羅建功等一面之詞無論陸戰未必可恃而總兵所督者水師防守洋面正其專責所謂縱之登岸則大事去者固其料敵之明欲求先發之制迨接戰不利則彼強我弱衆寡懸殊據奏內收合之兵不過

千餘豈能敵二十六艘之勅敵哉以是年廈門之役較之則當日之誤誤於浙洋之全無準備突而來措手莫及豈總兵一人之罪哉考總兵之死與裕帥之殉難於鎮海泮池被人搶救昇至餘姚而卒大略相同徒以烏撫參奏在前不得同邀卹典浙人以此惜之故附記於大令殉難之後以慰其不瞑目之忠魂云

又按是時任寧紹台道桂萼聞定海失守勢將內犯旁皇憂慮自盡而死遺書言兵單餉乏戰守兩難末云苟有一綫生機愚不至此伊相謂其身家念切蓋諄之也本管失守何至畏罪自盡即關課短絀亦可奏請豁免毋庸以賠墊爲虞其愚見所及不過因逆兵內犯不敢偷生負國展轉憂疑遂萌輕生一念其志未嘗不可哀而束手無謀喪膽褫魄抑亦不學無術者之所爲歟

粵東沙角殉難二十年十二月

三江副將陳連升同子舉鵬

千總清鶴

據海國圖志言沙角大角之戰陳連升以地雷扛礮擊斃西兵三四百人又言陳連升父子以兵六百當洋兵數千殲其兵數百以無援救而敗又粵東探報言陳副將父子殺賊最多旣敗賊奪其尸而鬻割之據此則琦相當日不撤防兵而有副戎父子禦之於口外關提軍祥總戎堵之於口內英人豈得肆其狡逞耶扛礮得力勝於飛礮以其靈動而轉運易也靖逆將軍來粵途次接奉廷寄言陳連升父子業已加等賜卹惟將弁傷亡甚多恐該兵丁陣亡尙不止此數著該將軍等查明琦善所奏有無隱飾等情然則

沙角之役遺漏之兵丁固多即將弁亦尙不止此數也

虎門殉難二十一年二月

提督廣東全省水師駐劄虎門關天培

虎門水師遊擊秦廷章

軍門號滋圃江蘇淮安人據粵東抄傳少穆制使信函或云家書或云寄友人書其事在沙角既破之後虎門未失之先制使知軍門有素見相國不肯增兵料其必死信內言大角沙角兩口被洋人占據造屋山上若小船闖進三門則鎮口唾手可得關提李鎮雖在靖遠威遠等處而兵單難以扼守衆文武僉欲大添兵力而靜老到此田地尙恐因增兵而阻和議懇求再四乃准暗添二百名乘夜偷渡官民均極憤憤又言十二月十五打仗之後義律却用文書照會提督前寄靜老信限三日內回覆否則再攻靜老連趕數信與義律屬不令人知而西官聲稱要事事全依方能歇手關李專弁請兵僅許密添二百名其差官來轅哭訴提鎮兩位在礮臺相向而泣既無援兵安得不坐以待斃予謂提鎮能以死報國是其分所宜然但何不將此情形透切一奏死後或有伸冤之日未知關滋圃能見及此否又據裕帥咨會蘇撫文內言英人日縱日驕各官再四告求添兵僅許密遣二百名乘夜偷渡致有大角沙角之事其時若卽添派重兵多募水勇與省城文武協力防勦事勢尙不至十分掣肘乃置同僚於膜外事西人如頑父一任提鎮大員痛哭請兵堅不調派雖重要之虎門僅止防兵數百提鎮相向而泣安得不復失事云云兩制使所言耳聞目擊異地同符

嗚呼蹇叔哭師伯仁由我軍門之死夫豈戰之罪哉

按粵東撫議定後奉

旨查關天培陣亡時靖遠礮臺官兵究係何人首先潰散飭奕山查明具奏隨據水師提督吳建勳咨稱據水師右營提標之把總何居桐查明首先潰散之兵丁郭標歐振彪等詳請解省審辦後據兵丁郭標等供稱關提督陣亡之前一日伊等曾經放礮擊中洋船蒙提督各賞給洋銀四圓交把總何居桐收存迨洋兵攻礮臺伊等親見何居桐被洋人捉拏下船次日放回伊等曾向何居桐索討賞銀並未分給曾經口角適奉查辦遂挾嫌具稟等語隨提訊何居桐供稱賞銀遺失自認挾嫌實不能指出首先潰散之人等語因發交南海縣看管何居桐畏罪自縊身死靖逆遂以何居桐已死該兵丁屢訊不承此外又無確證勢不能將當日防兵概行提訊徒滋紛擾應卽擬結等因入奏奉

硃批不實不盡之至事已如此卽使先逃之兵丁僥幸苟免豈有槩行誅戮之理朕只恨世道人心何至如是之不誠不實朕以重任付諸臣諸臣無非還朕一欺字再不解是何居心也欽此按海國圖志謂英人在粵募漢奸三千人每人給安家銀三十圓每月工食銀十圓而我守虎門兵月餉不及三兩提督關天培憫兵之窮苦自捐賞卹每兵銀二圓而議者猶劾以水師挾制提督要貴尙望其出死力乎予又聞粵東人言關提軍善識礮性凡高下遠近發皆洞中因虎門之役水師貪受土規火藥皆雜以沙土軍門後發之礮試輒不中方知受給憤激自刎是則以軍門之善恤將士

而不能得其死力且反爲敵用粵省之官兵大概可知且何居桐畏罪自盡則當洋人捉拏下船保無漏洩軍情之語恐被兵丁指出爲罪更大是以情急自盡也王廉訪所謂惟恐英人不勝則鴉片不行者正此輩矣

烏涌殉難同上

湖南鎮筵總兵祥福

巖山遊擊沈占鰲

守備洪連科

按烏涌離省六十里原奏所謂楚南官兵失利者卽此軍也總戎帶鎮軍兵六百守之不勝遂與其麾下二將死焉

福建廈門殉難二十一年七月

金門鎮總兵江繼芸

護延平副將凌志

署淮口都司王世俊

水師把總紀國慶

水師把總楊肇基

水師把總李啓明

據邸報總兵以救護礮臺被洋船轟擊落水死副將以下皆力戰死均得

旨賜卹在案

定海二次殉難二十一年八月

鎮守定海總兵官葛雲飛

鎮守浙江金衢嚴等處總兵官鄭國鴻

鎮守江南江北壽春等處總兵官王錫朋

署定海叅將張玉衡

處州副將託安泰

定海之再陷也三鎮轉戰七晝夜同時殉難是年七月裕帥督師於鎮海檄三鎮以主客五千兵防守定海洋面葛鎮駐師於半塘鄭鎮分守竹山門王鎮分守曉峯嶺當英人攻定海先駕舟駛進竹山門官兵轟擊斷其頭船之大桅旋即竄去三鎮自八月十二日至十六日以扛礮扛銃殲西兵千餘並擒其二帥斬之軍前士氣益厲會天雨日轉戰泥淖中方擬堅壁以休士卒而西兵忽舍舟登岸分三路進攻士卒皆殊死戰殺傷相當未幾曉峯嶺竹山門同時潰鄭王二鎮皆中礮死葛鎮勢益孤援兵不至西兵乘

勝進攻半塘之上城潰葛鎮身中四十餘創旋裹旋戰植立於厓石間而斃義勇徐保奪其尸回則王鎮已授身首於賊矣葛鎮之死也麾下張參將從焉鄭鎮之死也麾下託副將從焉其餘武弁死者三十餘人

據浙人所記則卹典之遺漏者多矣

三鎮之軍自潰散外其同時戰沒

者蓋亦不少矣葛總戎號凌臺浙江山陰人中道光癸未武進士發浙江試用積功升至總兵官十九年補定海鎮旋以丁外艱歸二十年六月定海之變大府稔總戎在浙久熟悉海上形勢奏請奪情起復一面檄之至鎮海總戎工韜略善文詞上書言定海扼要在道頭街之左右兩山因陳十二策遂以是年秋再補定海鎮值天津議撫伊相頓兵在鎮總戎到任設計擒英人之僞軍師某

請乘機收復定海伊相不欲行踰年粵東咨會至言義律已繳還定海伊相乃檄乍浦同知舒恭受前赴定海會同總戎帶兵收復並釋夷俘晏士打喇打釐等取總戎上年所擒獲者也總戎既至鎮舒亦以同知署定海事方欲沿山築外城以包道頭街之市埠工未起而廈門之警報至乃築土城環之敵至土城陷總戎手刃數十人敵少却復追之被一兵以長刃削去半面遂被戕事聞飭部從優議卹加提督銜

賜諡壯節浙之人傳其居官死事之本末有撰爲壯節年譜者予見之乃知其爲投壺雅歌之儒將也其收復定海寄其妹書云洋

一案未發之先人

總戎十九年之任卽爲大府言洋患當預防之

文武大吏漠不關心失事

之後倉皇無措遷延日久羣議蜂起或矜意氣或便私圖旣無切

中窾要之論亦無公忠體國之心時事至此可爲長歎予受事後

屢言大羊之性非大加懲創無以善後並將勦堵機宜分晰條陳而當事者咸以爲難自後局勢屢更忽勦忽撫迄無定見現雖收復而善後事宜更無把握予一武人仰荷

聖明起用惟不避艱危務盡我心而已又前署瑞安副將書楹聯於二堂云持躬以正接人以誠任事惟忠決幾惟勇筆意遒勁任定海時藏寶刀二一曰成忠一曰昭勇是則文山之取義成仁銘詣衣帶也所著有製械要言四卷製藥要言二卷水師緝捕管見十六卷全浙險要圖說八卷詞若干卷以上皆見於年譜者可以想見其胸中之蘊蓄所學之湛深矣

按三鎮用兵皆在定城之東南西南兩路蓋扼其衝要也城之東

南半里曰觀山宋時建道隆觀於此今名東山上有東嶽宮二十一年葛鎮建振威城北開向日門南對港爲五奎山卽今之烏龜巖西兵自南來遶西而東此爲逼近城郭之地最敗在後而竹山門爲西路之衝去道頭街五里三鎮始議築外城以包道頭街於城內因師期已迫權建土城設久安長治二門當西兵初至欲由竹山門進被礮擊去卽回踞五奎山復被官兵毀其帳房遂由陸路登岸攻曉峯嶺登山入陷之三鎮陣亡同在一日此定海用兵之大略據朱司馬緒曾所記采入思忠錄者附識於此至擒斬洋帥二人傳者以爲濮鼎查安突德也考二十年義律分路赴天津未嘗至定海爲濮鼎查死於浙不應更有其人或英人諱言其敗仍奉其僞號如張曲端幟之故事未可知也

近日粵匪如蕭朝貴

韋正皆子襲父名卽

之往事

安突德者卽上年餘姚所獲送至寧波伊相訊釋之是

時尚在浙也然則是役也英國蹶一上將一貴人矣定海之卒不能守豈非東南厄運使然哉

王總戎直隸人鄭未詳張參將浙江黃巖人託未詳

鎮海殉難同上

兩江總督欽差大臣裕謙

狼山鎮總兵官謝朝恩

鎮海縣丞李向陽

署黃巖中軍守備王萬隆

黃巖把總汪宗賓

解天培

黃巖外委林庚

吳廷江

欽程制使祖洛撰裕節帥殉難紀略云節帥抵鎮海聞廈門失守之報知洋人必將由閩入浙復行侵犯乃激厲將士擇日誓師於關帝天后之神大意謂浙江洋面以鎮海爲要口定海孤懸口外並非可守之地鎮海若有疎失必至震驚數省今與將士約不敢以退守爲詞離却鎮海縣城一步亦不敢以民命爲詞收受洋人片紙如有不用命者明正典刑幽遭神殛刑牲醴酒示無他意祭畢回營節帥愀然不樂曰外洋船上戰則張紅旗和則張白旗予見提軍所守之招寶山懸挂白旗故有誓師之舉以覘向背乃提

軍於祭告時稱有腿疾不能行禮心懷兩端已可概見道經學宮

忽見洋池旁石鐫有流芳二字怦怦心動設有不測其收我尸於池中可也自此之後洋舟連檣而來四出滋擾節帥守禦益堅雖屢接勝仗而昕夕旁皇寢食俱廢八月十七日定海失守究其所以因提標等營官兵未能得力節帥謂其幕屬曰今鎮海所可恃者惟徐州兵一千續調策應之兵尙未到來余曾祖義烈公殉難之期係乾隆二十一年八月二十五日今值道光二十一年八月遇此海警恐非佳兆因將

硃批上諭及奏稿等件寄回嘉興行館並將瑣碎家事無不一一提及曰予無子其可承祧者惟胞姪某一女已嫁一女尙在襁褓中一妾尙可守節須屬其互相維持同甘共苦悉聽予妻而稟命焉至將來喪葬之費署中廉俸及辦公銀兩除年來軍營賞卹外尙

有存者可以敷衍倘有贏餘卽交余妻收用家中房產僅堪餬口
悉聽子弟執管每年顧子妻妾女衣食勿因喪葬不敷變產辦理
所存奏稿卽託君等共各相好代爲刊刻與前勉刊益齋偶存稿
並交子弟存之祠堂設奉行查事實卽可以此二書呈送史館又
有遺書二封交阮姓簽押如何云云未之見也他日又謂君等書
生有寇至則去之義臨陣時可作速出城探聽消息勝則代草露
布敗則爲辦後事並諭衆家人會於餘姚勿殞我我死提臺必將
借我爲口實以退敵兵敵人亦不敢久踞鎮海再奉

命將前來妥爲辦理於大局尙屬無妨節帥蓋欲以身先作則置之
死地而後生也二十六日洋人侵犯招寶金雞二山節帥上城督
戰而提軍忽來城上謁見以保全數百萬生靈爲詞請遣外委陳

志剛前赴洋船上暫專驛磨節帥告以此不過苟且旦夕况有傷

國體提軍當卽下城旋又復來以伊一人身死分所宜然但家中妻
子兒女三十餘口實屬可憐並云伊女卽係今日出閩節帥云兒
女情長英雄不免但忠義事大此志斷不可奪此在城軍士共聞
共見者也嗣敵人從招寶山之西北後面攻打官兵卽時潰散威
遠城失守金雞山亦亂城遂陷城中火起難民潰兵互相擁擠有
提標護印兵丁揚言提臺現无下落又有一弁踉蹌奔走號泣呼
曰制帥已投泮池殉難矣惟時制府之家人余升陸喜等遙見節
帥於城陷時望

關叩頭投入泮池當卽喊救適副將豐伸泰千總馬瑞鵬等尋至卽
令跟隨兵丁將節帥撈起裝入小轎搶護出城至甯波府署經知

府鄧廷彩爲之易換乾衣臥以被褥而節帥已不省人事是時謠言四起咸稱西兵將抵郡城以十萬金購節帥尸余升等見節帥僅有微息敵人若來勢將不測情甚迫切迨四更時城啓卽率從兵數十人扛擡節帥出城覓有小舟行抵餘姚幕屬先後集視節帥心口尚溫余升在旁急喚少頃目張猶能略述提軍上城時情形移時神色漸變舟行四五里而節帥死矣流離之際旣無棺木又無貲財只得載尸前進二十九日傍晚至蕭山縣之西興壩適劉中丞遣弁來探豐伸泰及余升偕同渡江呈報中丞得信卽爲購備棺衾九月初一日節帥尸渡江雖死已五日而顏色如生繪畫遺像猶能彷彿相似經錢塘縣看視後至地藏菴收斂瞬息之間尸已發變中丞與將軍都統暨司道府廳縣各官視斂莫不詫

爲神奇卽日過杭州省城登舟北行此節帥鎮海殉難之實在情形也記曰裕帥殉節一事譌者孔多幾至忠烈之魂變爲懦夫之鬼是非之不明於天經地義世道人心均有關係查誓師之舉去年八月山中卽有傳聞其非事後編造可知焉有自誓師而自爽信之理迨殉節後初次傳言卽謂其自投泮池經人搶救昇至餘姚而逝後來忽有生前陣逃被百姓沿途指罵自吞烟壺並非溺死之謠不知何地何人所造昇尸至杭州江頭始有入斂衣衾棺木均係劉中丞爲之料理且與將軍都統方伯府廳州縣等衆目共睹有中丞奏稿可憑那得有中丞不信其死開棺看視之事至兵丁多人裝至轎中扛擡出城則與傳言相符然所扛者乃一投水救起不省人事將死未死之元帥非其自令兵丁架逃也小人

之好議論不樂成人之美深爲痛恨予自愧無文不能效韓昌黎爲許遠作傳猶幸有節帥幕中忠難與共之記室始終目擊其事詳敘節帥殉難節略予爲錄出刊存並附述數言以雪忠魂之誣而執譏慝之口道光壬寅正月記

按裕帥殉難之本末此所敘述卽其家人控於都察院張本也招寶山之威遠城乃明時總兵盧鏜與副使譚綸所築以防倭寇者又兪大猷臨山斬倭寇三百人追之於笠山港亦卽其地此所謂天險也山之後路有一石洞曰小潮音俗以爲仙人洞者遙對外洋近瞻山頂一徑可通崎嶇險仄洞之石壁刻有平倭第一關五字乃昔人扼要設防之處題以示後人者當上年之設防也有議於城外鉤金塘設礮三四門專防由此洞入據寶山之一路浙撫

從之道伊相遣候補府黃冕率鄉勇助守金雞山乃謂招寶石洞天險可憑遂撤鉤金塘礮位移至金雞山不謂敵竟由此路上山矣裕帥以提督一軍爲勁旅俾之當關禦敵而不知其適以開門延敵也將將之難知人洵未易矣裕帥當統兵赴鎮海時有霏霧鄉人於六月間獲登岸之洋人嗚啤地里等十二名送軍中制帥令剝皮抽筋以號於衆其奏疏有云活剝其皮以爲奴才馬韉生抽其筋以爲奴才馬韉是其欲得而甘心者食肉寢皮實持不共之仇與西人相終始又其駐師鎮海時分遣三鎮帶兵堵定海洋面瀕行授以秘緘令事急時啓之三鎮唯唯迨英人攻定海急啓緘示諸將弁曰有臨陣逃避者立斬軍前士卒皆惕息自致於死地故諸軍傷亡者過半而壽春一營幾殲焉

以上皆浙人所紀
采入思忠錄者 予謂

制帥之令行於三鎮而不行於提軍能斬臨陣脫逃之將弁而不能討開門揖盜之戎首殆亦有數存乎其間論者謂余提軍當日以宿將擁重兵故制帥明知其懸挂白旂隱忍而不敢發毋亦其將才之短不能使法先行於豪貴是則其不瞑目者已錢唐金大理應麟題定海姚大令手蹟駢句中有述余提廷讞事云壬寅之冬予濫廷尉時在大理任正三法司會讞也天子方責將帥之無功憫靖節之徒死法先貴近逮彼提轄太湖李文疑即侍郎李振祐聿伸宏議同年祁公即戶部尚書祁雋藻亦著讜論而一時議者猶欲惜其前功貸其令旨是直旌遁逃以紫綬而斥死士華降卒以銅筒而逐健夫也是是非非等於青蠅悠悠泛泛辨於白馬明明我

后洋洋

聖謨衰死鉞生金正矢直據此則當日余提軍就逮盈廷亦多聚訟而守正不阿者輒持公論國法以爭之則余提軍之死當矣大理奏中有藉敵要挾之語又謂竭千萬氓庶之脂膏保一二庸臣之軀命一時膾炙人口傳入義民公檄者也

謝總戎江蘇狼山鎮調防鎮海分守金雞山山與招寶對岸英兵入犯以一軍直指招寶一軍直指金雞而另載舟由狹道入攻其腹背時金雞山前方交戰突有一隊由沙盤嶺繞出山後兩路夾攻又遙見招寶山之威遠城陷我兵遂潰總戎方救護礮臺被洋礮轟擊入海尸身无獲未邀

賜卹之典後總戎之子來尋父尸不得浙人有見其死者爭歌詠傳其事與葛鄭王同稱四鎮云

李貳尹之殉難也時鎮海文武員弁逃避一空二尹獨居署中自經而死既行查得實奉

旨賜卹鎮人請建祠於招寶山據浙人崇祀記中紀其居官殉難之本末云公諱向陽字丹崖號葵村雲南趙州人由附貢生援例分發浙江以縣丞試用踰十年於道光壬午補授鎮海縣丞時鎮海大令方溶南北鄉河道以屬公董其役時時下鄉督視工程民至今賴之凡分外事概不與聞性尤狷介不妄取與歲已丑聞弟喪念太夫人春秋高乞養告歸有留別詩八首去之日士民傾城送之依依不忍別有泣下者歸數年太夫人棄養服闋後於辛丑六月由滇抵浙例以原缺坐補時洋人已踞定海鎮定接壤人皆畏不敢前公獨請赴任援枹鼓以從遂奉檄受事八月二十六日鎮

海失守居民紛紛走公獨僦然坐署中命猶子以鈐記繳郡或諷之去公笑而頷之有役請公出城公不應役遂巡不忍去公乃令往探洋人情狀比役返則公已御朝服自經於堂矣邑諸生劉鼎等醵金殯之踰月始由內河舁柩赴省大府以狀聞奉

旨加贈知州銜賞給雲騎尉世職嗚呼公官一丞耳无尺寸之枋可以自効位既卑而責亦輕顧激於忠義之氣嶸然不肯俛仰隨波自行其志從容授命視死如歸可不謂難哉鎮海之候濤出寶陀寺者舊有壯烈伯李忠毅公神主

忠毅諱長庚

今與署大尹畢君承昭

二尹丁君昌毅議於其中設公栗主列於忠毅之次並捐俸以爲春秋祭祀之需先府君官於浙與公交四十年余因得悉公殉難時事因作記以告後人鎮海縣典史席世勛記又思忠錄浙人紀

二尹殉難詩序言鎮海告警時上官委二尹赴曹江公幹蓋憐其老而遣之也二尹曰某欲違難以幸免何待今日卒不去城陷自經英人破城過其署見有公服懸於堂上者歎曰此守土忠臣也率衆軍士羅拜於前扁其署而去又記二尹絕命詞二絕句云有山難撼海難防市地奔馳盡犬羊整肅衣冠頻北拜與城存一死睢陽孤城欲守已倉皇無計留兵祇自傷此去若能呼帝座寸心端不聽城亡此可以知二尹惓惓之忠悃矣

王守備以下五人據思忠錄所記皆與謝鎮同在鎮海金雞山殉難者均得

旨賜卹在案五人皆浙江黃巖縣人

附記

浙江金華協副將重祥

據金陵朱司馬緒曾撰朱將軍貴神道碑言二十一年八月英兵復擾舟山入蛟門踞四明郡金華協副將重祥死於陣將軍遂奉旨簡放今職按蛟門卽指鎮海之役也蛟門島在鎮海之外洋爲入鎮之門戶當日英兵自定海來大府以此島孤峙海中不可守乃定計守招寶金雞二山副將之何時何地戰死他無可考而四明之殉難者惟郡城最無色時寧紹台道鹿澤長從裕帥在鎮海聞敗駕小舟退入慈谿託以受傷投水被人搶救遂未回寧余提軍自鎮海逃回郡中迨敵人入郡城又與寧波府知府鄧廷彩鄞縣知縣王鼎勳同奔上虞於是一郡之文武員弁及提鎮二營潰散一空八月之晦英兵泊郡城靈橋門下登岸劫掠城門洞開直入

無人之境有英目郭士利者占居府署出示安民時則自郡以東皆委之於賊西至慈谿亦有賊蹤往來偵探官兵僅畫曹娥江而守此當日甬東一帶情形也郡城既未接仗則副將之死於陣必非寧波意仍是從裕帥在鎮海同時殉難者或當日自定海退回力戰禦敵而死但未見開缺原奏且亦未知得有卹典否附記於此以俟他日攷證

又按二十二年慈谿之役揚威分三路進攻以一軍指寧波一軍指鎮海其時因攻寧波而陣亡者頗不乏人見後而紀事者多有誤記年月闕入於寧波失守中蓋但知大兵之敗於慈谿而不知其分路進襲同時並潰也自定海用兵以來其拒敵完城者惟松江尤提督一軍若其軍士不戰城門不閉敵無亡矢遺鏃之費而取之者則寧波之與上海也然上海猶有一典史擗柱全城維持正氣而四明寂寂無聞甚至如寧波府者捏為死而復蘇之穢語有用畫湯灌甦之語汗入彈章莫從末滅是則與城亡者城以人存若四明無殉難之人君子謂四明於是乎亡矣

慈谿大寶山陣亡二十二年二月

浙江金華協副將朱貴同子武生昭南

浙江卽用知縣顏履敬

甘肅西寧鎮左營游擊黃泰

陝西下馬關守備陳芝蘭

陝西經德營守備徐宦

守備魏啓明

千總田錫

把總邱法德

盧炳

顧德

林懷玉

外委方鼎憲

馬龍圖

張化鵬

王保元

陳均

楊福增

佟登鰲

將述維

何海

毛玉貴

馬步兵平天福等二百餘人

按壬寅二月之役揚威將軍奕經統大兵自紹興進發先據慈谿分襲寧波鎮海約以正月晦日同時進勦時參贊大臣文蔚率大兵駐長谿嶺令副戎統陝甘兵一千駐慈谿西門外之大寶山安徽同知張應雲率鄉勇千五百人駐寧鎮交界之駱駝橋相為策應逮師期漏洩攻寧鎮之官兵以二十八日先期舉事同時敗潰三十日駱駝橋之鄉勇中夜自驚二月初一日奔至慈谿洋人遂

於初四日來攻大寶山自辰至未我軍殺斃敵兵甚衆俄洋人兵船復自文亭進由散坂橋登岸夾攻鄉勇隊伍亂遂有橫衝直逼暗襲之事見七卷浙撫奏中忽又聞長谿嶺大兵燒營而潰參贊奔回紹城副戎力戰無援遂全軍覆焉海國圖志謂副戎以兵六百當洋衆二千殲其數百人以無策應而敗又言大寶山以扛銃二十擊死英兵四百人予按浙人有紀其事者言大寶山敗後洋人亦受重創載其尸累日不盡痛哭驚悸相謂曰自內犯以來未有受創若此之重者也今定海之東山另立一塔乃慈谿大寶山之戰爲朱副戎所擊斃者彼國人自焚其尸聚骨於其中然則副戎之戰功蓋亦卓卓矣副戎旣殉難浙人建祠於慈之西門外曰慈郭廟浙江學政吳侍郎鍾駿記趙侍郎光書又有撰將軍神道碑敘其

里居官職及殉難之本末頗詳附錄其大略於後

江寧朱緒曾朱將軍神道碑云將軍名貴字黼堂其先世江南上元人曾祖當國初順治間流寓甘肅河州隸卒伍祖仲遷屯循化營以把總從征金川陣亡父顯光以騎兵征金川礮傷折左足而廢嘗言三世尺籍一亡一傷無大功之建輒拊髀叱咤一夕夢神人金甲仗鉞引赤豹曰吾渾源山神也以豹賜爾家寤而將軍生及長軀幹豐偉面如渥赭年十七入循化武庠嘉慶五年川楚賊方熾調赴蜀營以獲猾賊趙天隆經略額威勇侯卽額勒登保賞授六品頂戴補榆林外委時黃連亞賊冉學勝伏密箐中持矛突出傷將軍劇甚卒奪其矛擒之由是勇名冠一軍十年凱旋補定羌營外委以數從征至千總道光二年戰雪山得

旨賞藍翎六年平回疆換花翎遂由涼州守備硤石都司玉泉寤夏
游擊升西安參將旋署察漢託洛亥副將所至多戰功二十一年
八月以英人內犯金華協副將重祥死於陣將軍遂奉

簡授今職益慷慨自任率三子武生昭南五子共南抵任二十二年
正月二十七日奕帥命領陝甘兵攻取鎮海行至妙聖寺文參帥
聞取寧郡兵失利檄止勿輕進令謁長谿嶺授機宜當是時全浙
楚豫吳蜀各省之兵合之材官蹶張諸軍以及奇遁韜鈴之士共
議進取於是大營駐長谿嶺餘兵勇或扼各道或伏陸路或屯清
道觀或截駱駝橋連營結隊星羅棋布而將軍獨據大寶山仍所
部九百人大寶山在慈郭西門外一邑之要衝也本城官兵及山
後鄉勇相犄角二月初四日卯刻該逆數千人自大西壩蜂涌上

岸將軍親執大旗麾所部颯擊鎗礮並發英兵再卻再進我軍无
不一以當百自辰至申饑不得食渴不得飲誓死格鬪戰方酣鄉
勇亂竄衝隊伍英兵乘間抄襲忽山後增洋兵數千駕三火輪船
駛進丈亭江至太平橋直逼山下巨礮火筒射燒營帳烟燄障天
四路兵勇先奔長谿嶺忽自驚潰腹背受敵將軍瀉血呼天豎所
執大旂於壘怒馬斫陣手斬數十級身中火鎗馬倒復躍起奪敵
矛左右盪決最後被火鎗中要害乃踣昭南以身障父格殺數洋
兵被創无完膚同時陣亡部下二百五十人皆死焉黃泰以下皆敘上時有
督糧官即用知縣顏履敬字心齋畢蘭進士嘗教讀將軍家意氣
相得糧台去大寶山二里登高觀戰良久奮起曰吾不可不助易
短後衣持所佩刀奔赴其僕止之不可乃執挺以從俄中礮俱死

山下是役也將軍以所部九百人敵洋萬兵將軍以身殉國洋兵亦大創收其尸累日不盡自是亦膽落戒勿深入共南受三傷死而復蘇脫衣覆父兄尸浴血而出奕帥以狀聞

天子震悼照總兵例議卹

賜祭葬銀兩祭文一道武生昭南亦並加卹各給予世職如例顏履敬及將弁黃泰以下世職卹賞各如例馬步兵亦給予賞卹吁將軍真得死所矣大寶山常有雲氣鬱勃隱隱聞鼓角聲夜見燈火燭天旌旂來往洋人往寧郡輒驚恐逡巡退去於是慈邑士民思將軍保完城邑威靈顯赫咸欲出貲建祠以申報賽癸卯秋試之士請於大府許之適王君有齡來宰是邑鳩工集費祠廟乃成自將軍以下皆得祀嗚呼將軍之師非敗也勝也將軍之身非死也

生也將軍少遇相者曰虎頭火色骨青生即不侯死必血食將軍

大喜故臨陣勇敢屢受重傷瀕於危嘗指其創瘢並所賞花翎以激眾至是以忠烈顯論者謂大寶山之戰得一將以千人助之必大捷然將軍此戰如巡遠之障江淮其功詎出戰勝下哉王君屬子爲記予見將軍嘗繪一獸人面一足云出安徽壽光山中名千

歲彪欲得其油以燒海焚洋船

山海經言南方堯光之山有獸焉狀如人名曰猾褊見則縣有大繇注亦不言其能

燒海也其圖猶在而將軍已成仁矣

此據思忠錄所輯然後段又似祠記體也

吳侍郎朱副戎廟碑係駢體文其後段云甬上元戎

謂三

甲新鬢

髮揚州都督

謂裕

殉早銜鬚留臺多鋒燧之虞列壩少藩離之固

公首收潰卒次練鄉屯洪濬千金甲明越組背崑一隊勇習韓瓶鐵浮屠林立於重關銅面具風生於百戰夫以公之奇胘在握披

靡無前佐路伏波而駛駕樓船隨寶車騎而遠臨靛海仆疇蛉碑
以直進掃蠟蠟塞以窮追弱水毛沈舊是磨刀之地廬山弓挂曾

開鳴鏑之場

以上追敘
甘肅戰功

何難魚罔象殪雄虺刃割飛廉鏃刺猛氏然

而炬燒雉尾赤舌無靈浪跋鱷牙黃頭解散當盾墨磨成之日是
鞞刀誓死之秋無何大帥納李祐之降信張元之謀池鵝夜擊思
間道以成功營鵠朝盤粹銜枚而輕發二十二年正月議收復三
城檄公領陝甘兵九百人攻取鎮河主客之地形既異聲援之犄
角無聞九節度出師狐疑莫決十團營結隊烏合爲多方其飛火
焚旂壞雲厭壘猶策單騎而乞賀蘭之旅叩旌門而籌細柳之防
俄焉高重捷之孤軍勢無後繼神師中之神弩力盡重圍鏃中三
升馬經十槩田橫烈士島中皆効死之人楊業將家麾下少生還

之卒以二月初四日辰加於申公陣亡於慈谿西門之外春秋六
十有四次子昭南以身蔽父冒刃捐軀卞氏壺盱闔門喋血葛家
瞻尙同日騎箕嗚呼哀哉結蒲之肖狀如生刻木而歸元未得幼
子共南執于衛社甫及成童袒背受戈躬陪行陳幸免王熊之冢
卒求鮑信之尸歸櫓河州厝兆新城事聞

宸衷軫悼襚賙優加少府之儲榮頒於左藏司勳之載世及於雲祏

詔加總兵 賜卹 賜蔭補

諭詞臣撰文遣祭昭南有子綱

命於及歲後帶領引

見棠貽段笏九重攜張掖之碑蕘守顏書一制軫平原之裔公亦可
以棲真八表瞑目重泉矣

按副戎大寶山一戰奕將軍及浙撫原奏皆不甚詳然其關係最鉅雖力竭覆軍而英兵自此不敢窺紹城且不久即退出寧波此爲中流之一壺千金與張許保障江淮之功爭烈矣浙撫十可慮奏中言將軍自慈谿回省臣詢其致敗之由及前次攻寧鎮不克情形據云伊等自上年抵蘇以後因堂堂正正之師恐難取勝是以委令安徽泗州知州張應雲等與地方紳士用重賞招撫漢奸向爲該洋人所任用者令其轉邀義勇分伏城內候我兵進勦之時作爲內應誰料事幾不密被洋人偵知預作準備而用爲內應者不禁反爲賊用致城池未復勇兵轉多傷亡等語是則慈谿城外之役漢奸鄉勇一氣聯絡當其在駱駝橋震驚潰散必其與寧鎮之洋人預有成約使我軍腹背空虛然後該逆得以前後夾攻

與招寶金雞之用兵如出一轍又恐長谿大營奔赴援應遣假扮難民之漢奸入山牽制而副戎一軍遂成孤立此豈戰之罪哉陝甘奉調之兵二千副戎所率不及其半此言馬步兵死者二百餘人又據思忠錄所采貝青喬軍中紀事詩序言朱協鎮麾下皆甘肅勁兵戰最烈死亦最多後見其部曲設位招魂死者幾四百人是副戎以忠義率其鄉人駢死枕藉而不悔宜大寶山之英靈久而不滅也顏大令身任糧臺無守土從軍之責而以故人之誼持刀赴難不負國不負友抑亦所謂求仁得仁而無怨者歟

中西紀事卷之二十四下

江上蹇突

海疆殉難記下

甯鎮陣亡

大金川八角棚世襲一品屯土司阿木穰

瓦土寺守備喀克哩

四川營參將王國英

外委徐宦

此與慈谿陣亡姓名同然一係守備一係外委且陣亡之地不同疑別一人

據員青喬軍中紀事詩序言阿土司所帥屯兵最勇攻寧波西門時為頭隊首當洋礮與其部下四卡松等百人駢死於城內又據朱將軍神道碑言大金河副將阿木穰瓦土寺守備喀克哩先於

攻郡時陣亡祀將軍廟惟阿土司官職所記互異耳

王參將國英者或稱守備蓋四川帶兵之將也据紀事詩序稱其攻寧波西門被擒不屈死軍中誤傳其降後其子尋得其尸函首而返又思忠錄言參將攻城奪東門入身被重創猶力戰馬蹶被擒不屈罵賊死與貝青喬所記大同小異

外委徐宦陣亡亦見紀事詩序言其攻城奮入紫薇街血戰死刃出於背猶揮刀手刃西兵數名

按以上所記即壬寅正月二十八日攻寧波鎮海之役所云南北兩軍者也時揚威將軍駐東關遣總兵段朝福南指寧波遊擊劉天保北指鎮海約以晦日同時進襲而漢奸有多魚之漏洋人踞城者皆預爲準備兩軍見事急便以二十八日進兵前隊皆敗後

隊望風而潰駱駝橋適當寧鎮交界之衝鄉勇遂散西兵反攻是以有大寶山之敗維時兩軍之陣亡者南路最多而四川土司一軍首入郡中其死事尤爲慘烈慈谿之役死傷最多者除陝甘一營外則四川兵也四川之土兵以大小金川所屯練者爲最強然皆長於野戰故攻城輒不效乾隆間設屯練土兵五百名分給大小金川兩路出征則糧餉加倍以五百人食千人之糧道光中葉調大小金川屯兵千名亦援前例給以倍餉其頭目悉遵內地冠服職止守備出征有功亦加二三四品銜頂或賞孔雀翎及巴圖魯名號每行軍必先鋒恥落後如大小金川同隊則按日輪派前鋒否則譁然爭先此魏源聖武記所紀四川知府謝興嶢征番時所記也是年陣亡之阿木穰喀克哩等皆屯兵頭目其官職應

在都司守備之間隨官兵而來浙人言天金河副將蓋書其官銜也故四川之參將王國英亦殉焉浙人所記互有異同然土司則其世職也其攻寧波當頭隊乃爭先之故技耳

附記

是時大兵進攻寧郡募江上水勇備火攻船爲聲援方距城十餘里火先發英人驚起架礮來撲死者約數十人

揚州捕役楊泳率其弟子數十人皆應募來營善拳勇得少林宗派者是日攻城令其先入城中謀爲內應迨大兵自外潰泳勢孤率其弟子巷戰不勝死者過半

前翰林院編修朱楷伏礮郡城外將於開仗時助官兵轟擊被洋人在城者先覺之朱得脫從卒二人皆死焉

鄉勇頭目謝寶樹河南人攻鎮海招寶山受重創因負歸駱駝橋前營創裂而死臨絕猶以我軍勝敗爲問也

當官兵進勦時以鳴鶴場土兵爲嚮導死者六人初無知者後其里人胡我鑒查明据稟大營始奏請賜卹如例

以上皆据貝君青喬所記蓋是時貝隨程大令鍾英投効大營其所記皆得之目擊者而撰思忠錄之謝二尹蘭生亦委辦軍務叅核得實故詳記之

乍浦殉難二十二年四月

浙江乍浦副都統長喜

浙江署乍浦同知韋逢甲

浙江乍浦駐防左營鑲紅旗佐領隆福

駐防右營鑲藍旗佐領署左營八旗前鋒翼領英登佈

駐防右營鑲紅旗防禦署左營正黃旗佐領額特赫

駐防右營鑲白旗防禦貴順

駐防左營正藍旗驍騎校伊勒哈春

駐防左營鑲藍旗驍騎校根順

駐防右營正藍旗驍騎校該杭阿

陝甘固原城守營千總李廷貴

涼屬蔡旗堡千總張淮泗

永昌營把總王榮

莊浪營把總孫登霄

甘提前營把總馬芝榮

涼屬土門堡額外委馬成功

乍浦水師右營把總韓大榮

副都統鑲黃旗人是年四月初九日在葫蘆灣城禦敵受重傷入
鎮城投水右營前鋒救出送至嘉興郡城越二十日卒此與定海
張總兵之死同例核之事後身故則當日投水受傷非飾詞捏報
也當二十年六月定海陷後有洋船一隻在乍浦洋面游奕副都
統督駐防營兵弁佐領等擊退意即赴天津之船過乍浦吳淞一
帶洋面陳軍門擊退洋船亦在此時無心戀戰開礮而逸其時駐防之兵有被礮
擊斃及受傷者共十餘名奏報在案英人之窺伺乍洋萌於此矣
浙撫十可慮奏中言浙省有兵勇六千餘名尚不如乍浦之衆是
當日官兵駐防必在六千以外而卒至於一敗不支况駐防陣亡

者二百六十餘人加以陝甘調防之兵陣亡者三百餘人其非不戰而潰明矣據邸抄言有漢奸在內接應內外火箭並發官兵迷亂遂至失守浙人傳其事者謂是時所募鄉勇有糧船水手青皮黨李姓率衆數百人應募給六品頂戴守乍浦當洋船在外先遣人由閩省兵勇交通入賣烟土爲李黨所劫閩勇銜之四月初十日之役倒戈相向者卽閩勇之藉手以報李仇也乍浦旣陷李黨復赴郡城與閩勇交鬪禾中爲之大擾合之大寶山一役其失機獲事皆起於鄉勇遂使官兵創痍民人塗炭哀哉章司馬山東人進士分發浙江卽用知縣署乍浦同知時率義勇沿塘防堵被洋人礮洞左脇氣未絕昇至六度菴中越日死其後浙省建祠吳山祀五忠皆文臣之殉節者司馬與焉

駐防之殉難者隆福禦賊於天尊廟火起突圍出寇衆窮追佐領掣佩刀奮刺西兵數名乃自刎英登佈駐葫蘆城力戰被賊以長矛刺死額特赫貴順二人設伏於天尊廟內寇衆越嶺二人率所部火器齊發寇受傷少卻適唐灣山援賊至縱火加攻受創死伊勒哈番善射當觀山接仗時伏林中以手弩殪賊甚衆矢盡爲賊所執被磔死根順總戰觀山灣中礮死該杭阿守北門城陷有勸其去頂帽走者該叱曰可廢職求活耶卒不去遂及於難七人死而駐防全營皆灰燼矣

陝甘調防之兵皆列陣於唐灣山北洋人分兵從龍湫山東僻徑掩至戰鬥逾時互有死傷敵勢少卻旋復益以精悍並力交攻我軍火器盡援兵不繼力竭同死武弁七人皆奏請

賜卹在案

乍浦水師之殉難者惟韓把總一人把總係本邑人守觀山牛角尖寨時西兵分三路進攻適當衝要之地把總被賊斷一指猶戀戰不少卻卒以中鎗子死

附記

滿洲駐防營兵陣亡與柱壽成等共二百六十七人在觀山戰沒者五十餘人餘皆轉戰天尊廟中或被戕或中礮死俱奏請

賜卹在案

陝甘調防戰守之兵勇共陣亡三百六十七人皆戰死唐灣山及檀樹墳清福菴等處俱奏請

賜卹如例

湖州協標太湖營兵陣亡四人

嘉興協標乍浦汛兵陣亡三人

本營水師戰守兵陣亡十三人又挑補新兵四人以上各營皆得旨賜卹在案

以上各營兵勇陣亡

滿洲駐防男婦子女死難者五十六人或被戕或投水死皆慘烈奉旨賜卹在案其最著者爲果恭人暨其二女云

恭人姓塔塔拉氏甘肅鎮海營游擊岳明之女乍浦駐防左營佐領果仁佈之妻乍浦陷恭人懼受辱有勸之挈女逃避者恭人曰若遇賊則求死不得矣時長女稱姑十一歲次女榮姑八歲恭人挈至署後投井死乍兵旣退佐領歸得其尸於井中請於後任副

都統奏聞奉

旨封節烈恭人二女皆賜卹佐領卽其井封土瘞之築亭覆其上浙

人歌詠爭傳之

以上駐防殉難

監生曹文昭城陷被逼自縊

生員劉楸松城陷出走遇西兵逼書偽示不從遂被戕

天尊廟僧達真與其徒壬林當西兵縱火焚廟僧徒力爭不得遂被

支解之

蔣錫院同弟錫景染坊西兵突入鋪中欲刃其弟力護之被火鎗擊

死

陸聖祥業酒坊中火鎗死

胡長春業柴鋪中火鎗洞腹死

陸貴傭工遇西兵逼令擡礮不從被槍死

朱冠英業木行夥被刃死

張諒業木行夥中槍死

張坤發業轎織鋪中火鎗死

徐元業木工英兵逼令導樓婦女不從以刃自刺不死復投水死

蔡吉慶坊工在葫蘆城中火鎗死

張雙喜坊工中槍死

胡世楣業茶鋪夥中槍死

馮松業布鋪中礮死

道署內丁張三中礮死

以上本鎮士民殉難

庠生劉若金妻顧氏夫早卒無子繼姪爲嗣城陷出走爲黑兵追迫投於橋下死

庠生劉東藩女七姑年二十二未嫁城陷之日賊以白刃脅其父七姑懼受辱投井死

劉進女鳳姑年十九依母楊氏紡織聞城陷出避爲西兵所阻復返西兵尾之急遂痛詈被戕罵不絕聲而死

胡贊喜女秀姑年十三四月初十日西兵以鎗刃壞其扉而入闔家奔投後園池中惟秀姑與堂弟三官同死焉

杜義茂妹貞姑年十八四月十一日出避兵遇西兵以威脅之貞姑懼受辱投北濠河死

以上本鎮婦女殉難

以上皆據禾中沈筠

字實甫

所撰壬寅乍浦殉難錄謝厚菴二尹輯

其大略采入思忠錄中統計合鎮官弁兵民婦女之殉難者共七百餘人西兵自入浙以來所過城邑民人皆先期走避惟乍浦濱於大洋出其不意豕突而來罹禍最酷然無一降賊者具見

國家養士之隆食士之報皆知以忠義節烈相激勸可謂難矣乍浦生擒洋人十六名則其臨陣而死者亦必不少該洋人內犯數年其受創之最重者沙角一也舟山二也大寶山三也吳淞四也乍浦雖無可考抑其次焉者矣乃議撫者輒以出師無功藉掩其尋盟重賂之恥不已慎乎昔魯人欲勿殤童汪錡仲尼曰能執干戈以衛社稷雖欲勿殤也不亦可乎然則所謂社稷之衛者亦問其能戰否耳固不得以成敗論也

吳淞殉難二十一年五月

江南松江提督陳化成

提標中營守備韋印福

前營千總錢金玉

把總龔齡垣

左營外委千總許林

前營外委千總許攀桂

額外外委徐大華

內黃營外委姚雁宇

軍門殉難之本末吳人撰有表忠紀實其所記足以補原奏之闕蓋牛督掣援而走故後段多飾詞其詳已具八卷中軍門既死

人昇其尸殞於嘉定之關帝廟又繪遺像祀之毛侍郎式郇視學

江蘇撰有忠愍像贊忠愍者軍門之

賜諡也其略言軍門起身行伍當嘉慶間艇匪蔡牽肆逆閩洋李忠

毅公長庚督師討之公起家從忠毅擊賊以勇敢知名厥後忠毅

陣亡麾下舊將王得祿邱良功卒平之軍門與焉以此受知於

睿廟積功至專鎮道光二十年自福建廈門提督改調松江蒞任六

月聞舟山之變卽馳詣寶山在防三年卒以盡瘁死牛督擁兵護

逃衆口交詈一時江浙士民謠曰一戰甬江口督臣死提臣走再

戰吳淞口提臣死督臣走然則一轉移間足操全勝之算豈非天

哉軍門號蓮峯福建同安人

婁縣楊秉杞撰有吳淞陣亡六忠事云韋君印福者上元人也豐

下痘花著面嘉慶中匪人方榮升謀不軌

即白蓮教林清李文成之黨

旋以捕急

遠颺時君以趨勇好謀處總督麾下知名遂以獲榮升功授奮武校尉又以屢獲紅鬍教匪積功升提標中營守備陳忠愍公使領銳師防堵洋人吳淞之役忠愍有死志戰方酣君顧先沒於礮時道光二十二年夏五月也年五十有六同殉者錢君金玉以上五人金玉字燮堂江蘇華亭人少入行伍洊補外委千總嘉慶中逆賊林清糾黨擾直隸山東河南三省前提督烏公敘君防堵徐州功遷把總又獲私梟二十餘私鹽六萬餘勦擢前營千總以勤慎歷署巡官二十二年之役君爲前衝監礮而洋匪自船桅上遙施飛礮或勸君避之君曰我年十六便食國餉豈敢避害不念乘車載危義耶卒以中礮死年五十有七君偉幹巨足里人稱錢大脚

以對范長頭云齡垣崇明人官把總訪其事蹟不得二許俱華亭人林字揚德少浮沈市井其鄰人姜明經國駒偉其狀資之衣履投提標下以獲私梟授修武校尉升左營外委千總忠愍察其忠勇尤任焉被創最酷年三十有二攀桂字瀛川先世多武功君少投營身豐而頡善使槍以巡海勞敘修武校尉隨防吳淞三載與徐君大華共事不辭勞瘁君補外委千總林補額外外委皆沒於飛礮年甫壯不獲展其長可惜也大華與二許同里閩方面白哲隸提標下以發槍迭中授冠服又數年拔補今職守海塘西礮臺司大將軍紅彝礮二十有四及洋船駛進海口忠愍令君開礮損其大艦一火輪船三斃西兵甚衆有頃西兵由東礮臺登岸擁而西君與許君力戰手刃十餘人遂以折足殞於礮臺年三十有三

事聞得

旨均賜卹如例

又據思忠錄言吳淞陣亡六忠之外尙遺內黃營外委姚雁宇應補志之詩云當時曾記六君子事後追識七忠臣士卒之死八十八人三泖滬濱無遺民是從忠愍陣亡者七人而士卒之死者八十人亦可補當日奏報之闕也

上海殉難同上

江蘇上海縣典史楊慶恩

按吳淞既陷上海遷徙一空自監司以下皆棄城乘舟遠遁少尉其碩果也播柱一邑之綱常足與定海全少尉千古矣予初聞其事意其途中遇敵或中敵受傷或被戕殞命後見松江人有撰少尉授命記者乃知其爲矢志殉城與李二尹之授命於鎮海孤忠亮節先後同符不足爲守土生色哉附錄記文於後俾異日修史志者考證焉

婁縣楊秉杞上海典史楊君授命記云陳忠愍公正志之後英吉利入寶山滬城震動而上海典史楊君慶恩獨矢志殉城卒死於難君字葦菴浙江山陰縣人由監生入貲補授今職性正直不以卑官自菲薄道光二十二年五月英兵犯吳淞江距滬八十里監司縣令各買一舟君聞之求見觀察不得見縣令語以大義令曰諾泊吳淞失守監司以下棄城去君頓足長歎作牘呈上官竟投筆曰吾亦從此逝矣有僕高升者潛從君所之見君倉皇出小東門呼扁舟渡春申浦探囊中百錢與舟子僕意君亦隨人作避地

計從之俄行至中流君躍身入水舟子失色僕號泣呼曰此我主
上海捕廳也時己未日辰加戌西兵方入城舟子急搖漿遠遁僕
求救不得亦走焉越五日西兵退僕乃與家人覓漁舟游流求之
於周家渡蘆叢見洋尸十餘中有漢衣冠一諦視之則君之衣履
鑿鑿乃斂之歸其柩於家事聞奉

上諭楊慶恩捐軀盡節情殊可憫著交部議卹欽此後得

旨賜卹如例

按部臣之議卹有二等其守城臨陣而死者應得從優卹典加銜
贈官卽照加贈例賜卹故知縣有加至道府銜者縣丞典史有加
至知州銜者若其聞變束手倉皇自盡則按其情節與畏罪同不
過照例子卹而已然亦須核其情實未可拘泥律文致幽光之湮

鬱也若夫一邑之監司守令相率而逃如典史者律以守土不過
司獄之責科以畏罪亦僅褫職之條而能見危授命臨難不苟不
已加人一等哉循例賜卹勸忠之典已薄則奏報之未詳也洋氛
三載蔓延四省文臣之死事者寥寥江浙之役兩大令守土之大令
惟定海一人
顏大令則一在糧臺者同知一貳尹兩少尉合之裕帥僅得七人固不及武臣
十之一也姚全李顏韋五人浙人請建祠於省城之吳山蓋文臣
之從其類也楊少尉以官於江蘇不得與五忠之列僅得祀祀陳
忠愍公然如少尉之大節足以砥柱黃浦中流予以專祠亦可以
愧當日之逃官厲千秋之臣節未爲過也

附記

據思忠錄記上海有頗健壇者亦奇士也其略言健壇名永剛上海

縣武生入庠後爲上海營馬兵當英兵內犯生請率鄉勇閉城一戰不許敵至生驅其妻子入池已亦赴水鄰人急搶救妻子得生而生已絕命矣事定邑人請祀陳忠愍公祠然亦未知其得有卹典否按洋人自陷寶山上海後駕杉板舟游奕於內地被沿江士民之狙殺者不少故無錫江陰一帶經團練之鄉兵驅逐出境始由福山放洋闖入大江壬寅七月英人以兵船封靖江港初九日有英兵十餘突入靖江縣城民呼鬼至譟而逐之有童子從城上投磚適中一白人斃之洋船遂退離港遠泊次日遂謀報復有三洋船從對江駛來靖江人糾衆拒之西兵發巨礮轟擊民隱大隄以自衛不傷一人並於隄下伺間用擡槍迭擊凡殺黑人十餘最後乃擊中其火藥艙洋人自燔落水死者無數遂遁去不敢復窺靖江

是時牛督方議撫靖江縣令報至責以大膽生事竟不上聞然則事急而求諸野未嘗不可收同仇敵愾之功惜頗健壇之謀不能用也

口殉京難 二十二年六月

鎮守京口副都統海齡全家殉難

按副都統殉難傳聞失實迨者相奉

旨查明其事始雪其見八卷中蓋當日西兵攻城城中僅駐防一軍都統閉城登陴而守民不得出遂有怨言予謂昔人言鑿池築城與民守之都統當日雖无効死之民而城之必當守與民之不應出實分與義之無可辭若其登城而呼敵者

有謂都統誤事以致民登城呼敵致命

皆亂民也卽殺呼敵之民以肅軍律者亦非殘民以逞也自常鎮道

周項見滿城文武惟副都統一入殉難懼于重譴乃許以誤殺良民被民殘害等情時又有言都統開城逸去不知下落者及奉旨查辦乃得其尸及一妻一孫於灰燼中又取據駐防合營切結奏聞方知副都統固全家殉難者京口之民痛恨周項誣陷都統因而株累無辜遂與大獄於是編為不殺此人民心不服之揭帖榜之通衢周以失守照律遣戍而清議之誅嚴於斧鉞矣是非之公定於身後然則都統之死固足以收拾海疆之殘局殿諸忠而無愧色者也

續記咸豐八年殉難員弁

大沽殉難咸豐八年四月

游擊沙春元

署游擊陳毅

候補千總陳榮

經制外委石振岡

護軍校班全布

護軍校增錦

驍騎校蔡昌年

候補千總恩榮

把總李瑩

正紅旗烏鎗藍翎長富

烏鎗藍翎廣均

候補千總劉英魁

查接仗陣亡各弁自沙春元以下八人係六月初一日奉

上諭俱著交部從優議卹在案其李瑩以下四人係直隸總督續行

查明請

旨分別議卹奉

上諭廣均以上三員均著交部從優議卹其因傷身故之劉英魁著照陣亡例一併賜卹欽此按是時任直隸提督張殿先署天津鎮總兵達年署大沽協副將德奎及管帶京營礮位副都統富勒登太管帶馬隊護軍統領珠勒亨均先後潰逃而直隸總督譚廷襄當前隊失利乘轎向西奔走亦據僧王查明叅奏在案是當日文武員弁三品以上無殉難者此十二人皆以守礮臺力戰而死西人月報所稱大沽武弁之忠勇外國人亦心慕之者也其言礮臺

失陷之時有四品頂戴二人一人執旗自刎意指陳沙二游擊也又言堅守礮臺三次爲英人礮彈所中三次去而復返又有一弁於英人逼近礮臺時單身從礮臺上跳躍而下前來迎戰英將命生擒之忽被前隊兵丁鎗斃陣亡等語此皆該洋人身在陣中得之目擊者惜此數弁無從攷證耳是知當日大沽之將弁非不能戰者徒以无援應而敗轉令外國人爲之惋惜不失直道之公也又按上年粵省被陷制府爲洋人所執其將軍以下始皆羈禁城內後藩臬糧道俱乘間潛往佛山鎮不聞有殉難之大員也至當日攻城官兵失利武弁是否有陣亡者邸抄无從查核據西人月報記廣勇事甚詳亦不及也惟述葉相始在天竺後又挾之至加爾各搭地方在洋人未嘗加害卽相國亦未聞有乘間自盡之事

附記於此

大沽二次殉難九年五月

直隸提督史榮椿

大沽協副將龍汝元

海口營都司齊連布

正白旗烏鎗軍校塔克慎

千總王世敷

把總張文炳

按是年五月英人偕俄羅斯赴天津換約不遵原議改由北塘海口行走仍闖入大沽口內毀我防具二十五日有火輪船十餘隻拉斷防口鐵鍊十餘架張紅旂挑戰被官兵轟擊沈其船隻又敗

其步隊之兵始懼而遁是役也僧邸於天津一年久之訓兵練勇修復礮臺卒操全勝之算而自提鎮以下身先士卒奮不顧身雖以中創殞命而洋人全軍覆沒保障天津其功不小奉

上諭英人狂悖無理此次痛加懲創應知中國兵威未可干犯該將弁等協力齊心大獲勝仗實屬異常奮勇直隸提督史榮椿大沽協副將龍汝元身先督戰奮不顧身致被礮傷殞命實堪痛惜著交部從優議卹並於直隸天津及各該原籍建立專祠其同時陣亡之海口營都司齊連布等均著照例分別議卹以慰忠魂欽此
大沽北礮臺陣亡咸豐十年七月

直隸提督樂善

事具十五卷中奉

上諭該提督久歷戎行戰功迭著前在海口防所陣亡殊堪憫惻著照提督陣亡例賜卹並於海口地方建立專祠以慰忠魂欽此

通州殉難十年八月

通州西倉監督內閣侍讀銜中書貴倫

州西倉監督世襲一等輕車都尉戶部主事王潤

據原奏稱八月初九日因通州一帶被擾該監督等恐倉儲致有疎虞同時在署自縊捐軀情殊可憫奉

旨均交部議卹欽此

畿輔陣亡咸豐十年八月

委翼長阿克東阿

總管台斐音保

據原奏阿克東阿於八月初五日在石縫營內打仗陣亡總管陣

亡地方未詳均奉

旨賜卹在案

淀園殉難十年八月

總管內務府大臣文豐

據原奏淀園被擾殉難奉

旨著照尚書例賜卹

清漪園員外郎泰清全家殉難

據原奏稱八月二十二日淀園被擾該員外郎與其母王氏等十六名口全家自焚奉

旨員外郎泰清伊母王氏伊兄六品苑丞泰東嫂梅氏妹五姐姪候

補頂戴拜唐阿文惠閑散文志姪女二姐三姐並伊姊候補委署
苑副基恒之妻王氏甥鍾琳鍾瑞鍾秀女三姐四姐及婢女一口
均著交部從優分別旌卹以慰忠魂欽此

中營千總燕桂全家殉難

據原奏稱該千總全家十六口同時遇害殉節情殊可憫奉

旨該千總燕桂及其親屬八品頂戴燕茂林燕岐源燕劉氏燕馬氏
燕陳氏燕劉氏燕雷氏燕王氏燕石氏大姐三姐四姐五姐九蓮
四紅均着交部分別旌卹欽此

中西紀事後序

我

聖清受命溥將爾宇大啓幅員之廣卷宋包明聲教所敷超唐軼漢
康熙癸亥臺寇旣平海禁甫弛梯山航海信及百蠻獻雉貢
肇於四省古里天荒之部稟正朔於

中朝羶腥椎結之儔通聲名於上國大抵住冬有期防秋無警降城
三築質館兩開修貢則但取羈縻回易則嚴杜侵越天下有道
守在四洋二百年來顛若畫一絕履霜之漸至劬未雨之綢繆
法至良也意至美也自時厥後疆吏闖茸腴削其筐篋奸商狡
狙折閱其賓布構怨之由激於缺望懷柔之政反啓釁端遂乃
海鳥羣飛瘼犬狂吠狡焉思逞驀然而來臥榻之旁竟有他人

軒睡光天之下公然魍魎橫行褻我封圻隲我藩衛已揖開門
之盜猶歧築室之謀陰拱而觀倉皇失措償費竭澤互市漏卮
陽託和戎陰同讓釁實昧抽薪之計早貽伏莽之戎此華洋之
變局亦千古之創局也方其索香港之賊要白門之撫徧天津
之潰怙海澱之驕子取予求輸銀輸地天地爲之震撼滄海聽
其橫流熾火爭光於曜靈破獍獠牙於當道漆室女聞而啜泣
况乃鬚眉童汪錡誓以身殉矧曰壯士凡有血氣者莫不撫膺
浩歎指髮狂呼數衛律之罪上通於天繫中行之頸欲答其背
流莖而雅聲變哀郢而騷體興此當塗夏曠甫先生變中西紀
事所由作而隱其名爲江上蹇叟者也先生身列戎行手披幕
牘凡所搜輯確有親聞義本春秋防嚴中外長沙憂國懼足首

之倒懸臣朔上書戒羌戎之接軫每當酒酣耳熱憤極悲來拍
案一呼唾壺立碎僕叨居小友又屬同官陸子訂忘年之交杞
人抱墜天之戚聞陳管見偶贅芻言未嘗不誇薄縞可紉龍衰
之華曲鍼可備魚吞之用今先生往矣而外情叵測日益蔓延
桐喝虛疑莫窮究請立保護之約適以開畔釁之階括有用之
財不足填無厭之壑二三臣工務保祿位王倫首議貽君父之
憂張禹暮年顧孫子之計方且謂撫局不可一朝而壞釁端不
可自我而開隱忍依徊息心覲面齎糧以藉寇伸洋以抑民世
所謂識時之傑經世之才也而號憂國託持重者又復大事模
稜虛名養望一籌莫展百喙俱暗譬之養虎於室而責其帖馴
豢寇於家而矯爲揖讓不亦慎乎嗟嗟習俗移人賢者不免是

非所判行路皆知三表不聞於漢廷五利奚裨於晉國難端既
啓流弊無窮始焉豕突狼奔堅瑕避就繼乃鷓張狙詐緩急相
持祇廟建於京畿麤裘游於內地五口通商而海疆深入長江
試市而天塹能飛縱可汗爲天驕踞夜郎而自大墓拱者難辭
作俑尸居者猶蹈前車獨不念冒汗馬之功可以蔽一時而不
能掩將來之耳目作腐鼠之嚇可以恐懦士而不能懾天下之
人心乎傳曰無滋他族實逼處此詩曰誰生厲階至今爲梗君
子觀於當日之裘帶雍容牛酒餽勞金墉之恥未雪澶淵之盟
將寒雖欲諱之惡得而諱之今夫中興之規非不閱也海防之
備非不預也輪飛入檝礮擊連珠我不弱於彼也津沽之紆迴
圖淞之扼要彼不敵於我也衆寡之勢勞逸之形直壯曲老之

謀主順客逆之理固不煩再計決也若猶一意遷延受其要挾
恐汝陽之田未返陳倉之道先通暮楚朝秦應接不暇得隴望
蜀誅求無時相率效尤聞風踵至毒早成於附骨害更甚於養
癰可欺而欺當斷不斷苟自強之有策和亦無損於國威但示
弱以要盟禍恐即伏於事後蓋病迫膝理而始服消散之方水
決隄防而徐議捍救之策晚矣惟冀

乾綱速斷勝算獨操用張撻伐之威一激忠義之氣宿將元勳之選
繫豈無人左右親貴之言未必盡善聲罪致討定自

許謨殲一警餘消其觀望莫如磐石詎割地以請和收之桑榆幸亡
牢之可補匪爲戎首實順人心肯單于寇漢終犂老上之庭突
厥叛唐卒奏藥師之捷酒數十年之侵辱基億萬世之安強用

夏變彝古今一轍他日者獻囚泮水偃伯靈臺畫玉斧而不渝
鞏金甌於無缺先生此書既直筆之可徵自信史之必探九京
可作毋亦有飄然而喜者乎先生以名孝廉作賢令尹青山卜
築皓首窮經披肝之義雖殷防口之嫌竊引某大吏見是編以
爲忤時削其板讀杜牧之罪言孤忠未泯仆昌黎之貞石元氣
仍存僕行篋收藏僅餘數冊買紙鈔寫欲貴三都爰槩聚珍以
廣傳布但懼茂陵亡稿無俾魯國塚名庶讀是書者知其史實
稱心才雄作手墨子寶書之秘賈遠金粟之刊信而有徵例繫
年於司馬聞者足戒推良史爲董狐豈云享敝帚以千金允足
珍吉光之片羽已辛巳春仲賢中人敘於慧香閒簪

附錄偷頭記

道光二十一年八月西洋英吉利據寧波府明年正月晦我師襲
攻之不克是時大軍屯紹興府而舒君屋庵者以累官寧波在軍
中一日縛間諜至將斬之叩頭乞免死舒君視其人則府之善爲
偷者也意哀之曰若爲諜而死盍爲偷而生若能竊洋人頭來吾
且白將軍賞賚汝偷諾而去華人謂其國人曰白鬼其收刺他部
落以爲奴而戰以爲兵者爲黑鬼旣而偷果以洋人頭獻舒君介
之見將軍將軍大喜厚賞之又旣而獻頭者紛若乃與羣偷計其
直黑鬼一頭錢若干白鬼倍之生獲又數倍之自是踰城穴隙日
昏暮徧府中無非偷者洋人之據府城也夜必巡街巷兩洋人先
後行方磔格語笑後者忽無聲回視之已失頭而仆前者大駭僵

立若槁木俄頃又失其頭偷兒或著西衣冠持竹杖橐橐然曳烏皮屐以來洋人近與語遽刺殺之其生致之也則以布自後扣其頭使不得鳴而絞布兩端負而趨至幽僻箝口寘諸橐網之以繩出城或爲洋人所見追之則負以趨曲巷追者迷失道又懼其害已也廢然而返洋人巡視城上亦往來通夕羣盜數十名以長藤爲環暗默候城外聞城上巡者過爲怪聲驚之洋人倚堞俯視遽以藤環鈎其頭而墜既墜塞口中以物而反縛之而候之如初城上洋人謂墜者誤失足且聞其顛蹶皆伸頭下視思援之又盡爲偷所鈎致乃始譁然擁所獲大笑以去疾如風凡城內外之以竊洋人頭至者黨日益盛計日益巧所獲日益衆其奇策秘術人莫得而詳也他日偷獻頭於將軍將軍語之曰得洋兵百不如得其官一能生致之賞萬金官三品不者取其頭可也久之反命曰官不可得也官未嘗夜出臥窳室而西軍環於外吾儕趨捷善升屋者飛登其臥室密揭瓦偵之親見其至室中脫衣冠入帳而寢既而下揭帳空榻也明夜又易室隨偵之如前而空如故吾儕利其頭爲奇貨常常夜守之終不得知臥所得官一不如得其兵百之速而易也此時洋官雖防護甚謹不可得而心常惕惕每日夕穀醜自驚警旦日而以失首報者恒數十或多至百餘白人夜出邏往往曉不歸其黑人無名籍者至不可算由是大懼盡率其屬登舟而去之於是將軍以克復寧波府入告升權敘錄各有差當是時羣偷暴當而偷長三四輩且得將軍所賜功牌以五六品冠帶榮里中

此四明徐柳泉時棟舍人所撰也錄之以見薄海公憤卽獮宗
李汝堪効指臂之助固不足平矣爾時羊頭關侯纘兒榮之君
也猶差與齒今則海上逐臭執鞭欣慕詭遇者據要津躁進者
趨捷徑焉吁是爲偷之尤而並偷之不若者也冠履倒置愈趨
愈下可勝慨哉書中人識

